

Ni Yensa Ajóoninne Ho Adama Apuñne

Emisiyongo inno, ifak ílobhunek a gubaarhu Yensa, kanda guliiho, ílobhunek a gubaarhu Adama ingi Awa. Lentaarenj mara Adama ingi Awa ingine ñanraagofongo ínliiho mi Díino ayabne a duniyango. Ñanraagofongo nip, mintoronj nip imbi Adama ingi Awa gínfuruntoonunje. Fo Díino ayabne Adama ingi Awa, aninkeeniñ a kantíg kanjóoni k'ayéjuhne Toolhu Iden. A toolo nómar, anyikyik hoñon hoñon h'ansohálane. Duniyahánin asúsum na dáde. Faka, a waato ámár ayikyik biñankayo bájegenenku immerenj ingi Díino. A Toolhu Iden, gandékaydekay ingi Díino. Anlóboh ingi Díino, ki Díino alóboh ingi immerenj. Ampokun Díino ki Díino apokuneeniñ k'anéereeniñ hoñon hoñon h'ansohálane.

Díino ayabyab ñanraagofonjo ki biñankayo
ayik bájegenenku immeren ingi Díino. Angu,
faliiho, a Toolhu Iden, biñankayo ayikne
bájegenenku ñanraagofonjo ingi Díino.
Kanda Adama ingi Awa ampápájul mara aji
anjégumi luwahu Díino, biñankayo
bájegenenku immeren ingi Díino
alekaháneh. Anfúrhuneh a Toolhu Iden
k'anníiro. A waato ámár, Díino
anéereeniñneer luwa amánduk bareñ.
Nómár ingi noorañ? Atéekineeniñteekin
mara ampiren andóm bídimerenku sino
sigurumaaren a toolo f'adék afalla
bídimerenku sinojo s'anéerumehne
búpájulo hójoonino ingi hójondojo. Angu,
Adama ingi Awa, neerañ gankanne? Iblisa
adék ajodeeniñ. Adék ajah arinku
busumoolo k'alób ingi Awa. Ayéj Awa:

Hóge marigen, Díino ayéjoonunne,
«Buku údomonj bídimerenku
munnonjo haani bi ínsenduk a tooło
inno.»

² Udikaamo ayéj busumoolo:

- Ipirenminj ídomminj bídimerenku
munnohu tooło inno ³kanda a
gubaarhu bídimerenku sinonjo
s'agune a bájegenenku tooło, símár,
Díino ayéjne biki ídomminj, haani
gumapun, nim diniironnj

⁴ Fo udikaamo alóbine nim busumoolo
aṇoolin ayéj:

- Marigen girenj! Duniironhonj! ⁵ Díino
apápájul maro údomonjdir
ulóndahánanj. Umírhinenj ingi ámár

Díino iniman n'apájulahinehne
hójooninno ingi hójondoŋo.

Nim Iblisa ajodne udikaamo.

⁶ Angu udikaamo afég bídimerenku
sinonjo n'ayaane ajóon, ingi
n'asúnkunehne búdomo. Afak
awosen maro aji adómi alóndaháne
iniman n'asíibane gulóndaŋo.
Bawoseni hómár afat k'adóm.
Badómi adék anah údiigenkinem ki
úmár mees adóm. (Gen.3v1b-6)

Inini, horaŋ ayikne fo Adama ingi Awa
ankanne ho Díino adígumne? Hójondoŋo
h'ankanne akankaan k'ambénnay ingi Díino.

Jantenteŋ Gúloku Díino:

²³ Gúmár akanne Díino Umuyhintor
atibaar Adama afúnnom a Toolhu
Iden awúyenem bíduk k'adék alááful
didiirango di Díino ayabumemne.

²⁴ Batibaar Adama ingi udikankánam
mees, adoohor maleekango
aninkeeniŋ na ba bumarahu
burukumbanku toolo. Maleekango
ámárán, cerubongo ganretuhne.
Awonnulineeniŋwonnulin a
burukumbaano b'agune bi bísibango
afúruntohone ki nim wúur dangan a
toolo nómár. Maleekango ámárán,
noŋon noŋon alah busandi bu kuulo
afútoh k'anyíirimbineh a
burukumbanku toolo ki nim wúur biki
apút na a sinohu kanjébo.

(Gen.3v23,24)

Biñankayo b'aguyerne imbi Adama ingi
Díino ajóonumeeninjoonum fanfan.
Ampokunaypokunay baman a
jamméejenkinin. Díino, galóbi Adama
asúumom fanfan baman a hafithinem, a
jamméejhinem, a bukiñhinem. Sinfiyumayo
mees s'aguyerne a bájeginenkinin afufuuh
dáde. Ansíibáásiib k'anguyay kantíg
ínkánduk. Adama aféfeg bajónku Díino ingi
bafukunom. Wúuro m'anandenne hotir ni
Díino ajónne dáde, n'afuuhne, eke
asíibaháneh k'anoya, k'abúuñaham? Kanda
fam Adama aféfeg bajónku Díino nip bísiba
bísiba. Biñankayo bi Adama ayikne ingi
Díino anafahemnafa dáde. Kanda fo Adama
afusulne gúloku Díino, na gapuñne hómár
nip. Díino dabayun bupokunku Adama,
kanda biñankayo bi famo apuñapuña. Angu,

Adama ingi Awa, n'ankanne ho Díino
adígumne, pirendenje k'anfant anguyay
ingi Díino a toolo. Díino añantay
afúnneeni na mara Díino arenrenn fet.
Pirenden k'anguyay ingi mi rennárenenje.
Úfegen, hójondojo ho jamaño ankanne
akankaan ki ñanraagofonjo ambénnay ingi
Díino.

Ininkaman, aji udikaamo ambénnay ingi
údiigenkinem k'afúr bajaho, upiren úyej,
«Hójondojo akankaan k'ambénnay.»
Gúduk, udikaamo akankaan hójondojo.
Pokundonj údiigenkinem mbanj gira
abúuñaham. Gúduk, údiigeno akankaan
hójondojo. Gamalamal udikankánam dáde,
angu afúr bajaho. Aji údiigeeno ingi
udikankánam ambénnay, upiren úyej,
«Hójondojo akankaan k'ambénnay.

Hójondoŋo h'ankanne apuñne
bájegenenkinin.»

Angu maŋ nim imbi ñanraagofonŋo ingi
Díino. Hójondoŋo akankaan ki
ñanraagofonŋo ambénnay ingi Díino. Kanda
hójondoŋo a gúbidhu Díino gireŋ! Díino gira
akaanah hójondoŋo. Mintor ñanraagofonŋo
inkaanoŋne hójondoŋo. Gúmár akanne
ñanraagofonŋo ambénnay ingi Díino. Gúmár
akanne jamaŋo anyéjeh, «Díino
aŋantinayŋantinay ingi mintor. Haani
usalihi, Díino aŋantinayŋantinay ingi
mintor.»

Kanda gúlob gúsuumi ingine, Díino
akankaan honj k'ajóonin bájegenenku
mintor ñanraagofonŋo ingi ámár Díino. Díino
akankaan honj ki ñanraagofonŋo ampiren

anfak anguy ñanñanku Díino.

Gúduk, aji údiigeeno ingi udikaamo
ambénnay ki udikaamo afúr imbi
údiigenkinem, jamanku údiigeeno
ambúuñhunek wúur imbi jamanku
udikaamo ki k'anjóonin bájegenenku
udikaamo ingi údiigenkinem. Ininkaman, aji
udikaam Ukaabo afúri imbi údiigenkinem
Ukoli, Ñankoliño ambúuñhunek újeebunku
Kaabo imbi jamanku udikaamo k'ajóonin
bájegenenku udikaamo ingi údiigenkinem.
Horaŋ akanne ambúuñi újeebunku Kaabo?
Ambúuñhunek újeebunku Kaabo mara úmár
ambabaybabay ingi bádinku udikaamo
k'afak ambabay ingi bádinku údiigeno.
Angu, úmár apireenne ajóonin bájegenenku
údiigeno ingi udikaamo.

Angu, ñanraagofonjo ambénnaybennay ingi Díino. Anfúrfur imbi Díino a gubaarhu jínubonkánin. Inini, Díino, neeraŋ gakanne k'ajóonin bájegenenku mintor ingi ámar Díino? Abúuñribuuñ wúur k'ajóonin bájegenenku Díino ingi ñanraagofonjo. Abúuñribuuñ Úbárám a duniyaŋo k'ajóonin bájegenenku ñanraagofonjo ingi Díino. Úmár bareŋ, Yensa bareŋ apireenne ajóonin bájegenenku ñanraagofonjo ingi Díino mara Yensa bareŋ ambabayne a bádinku Díino, afak ambabay a bádinku ñanraagofonjo. Úmár ingine Úbáku Díino. Afak aguy úbáku uraagofonjo. Yensa ingine újeebunku ñanraagofonjo mara Báábám ingine Díino, kanda f'adékirne a duniyaŋo aguy uraagof, nunom ingine uraagof. Gúmár akanne upiren úyej, Yensa ingine újeebunku

ñanraagofongo mu Díino abúuñurne a
duniyaño k'ajóonin bájegenenku
ñanraagofongo ingi Díino. Fo Yensa aniirone
a halihano, acaamcaam jínubonkintor.
Acaam jínubonkintor buruhu mintor.
Manini Díino apiren akafari jínubonkon nip
mara Yensa acaamcaam jínubonkon buruhu
fi. Aji ufiyumi Yensa, Díino akankáneh
hómár a binankan. Akafarihineh jínubonkon
nip. Uñoolinkineh imbi Díino k'uguy uñanku
Díino. Uguyhunek a bádinku Díino.
Añaañaañaañ a Líibárfu Gúloku Díino mara
m'anfiyumne Yensa ingine jarku Díino.
Díino ingine bááhánin. A bádinku Díino
gangune. Sañ añaañaañ a gubaarhu
m'anfiyumne Yensa:

¹² Hamanim índukoño
anlahuremlahur k'anfak anfiyumem.

Kanda m'anlahuremne nip úmár
anéereeniṅneer binaal k'anguy
jaraku Díino. (San 1v12)

Angu, guliiho, hójondoṅo ho jamaṅo
ankanne akankaan ki ñanraagofonṅo
ambénnay ingi Díino. Kanda Díino
abúuñribuuñ Úbárám a duniyaṅo k'ajóonin
bájegenenku ñanraagofonṅo ingi Díino.

Gunakiino, hójondoṅo ho jamaṅo ankanne
akankaan ki Díino adanka ñanraagofonṅo. Fo
Iblisa ajodne Adama ingi Awa k'ankaan ho
Díino adígumne, Díino
adankaheeniṅdanka.

Jantenteṅ Gúloku Díino

Ho Díino atéekinne Adama:

¹⁷ Balóbi nim ayéj údiigeeno:

- Inini, fi n'údomne gúloku
udikankan k'ufoola bídimerenku
sinogo s'ídiigumenne búdomo,
idankahuno didiirango. Inini n'ukanne
nim, duniyahan nip uñantay udoho
fanfan buyikum gufoolango. ¹⁸ Faka,
japoño jajóndongo ingi járámبالusenjo
awalháneh a didiirango. Japoñhu
kanaanjo aguyhunekne gufoolahan.
¹⁹ Marigen! Úgiifhineh maf buyikum
gufoolango baman da uniirohunekne
k'unjoolin ufak uguy didiira. Kuku
ulenta mara ingi didiirango
giyabumenne kanda unjoolinkineh
ukaan didiira.

Nim Díino ayéjne údiigeeno.

(Gen.3v17-19)

Angu Díino adankadanka Adama ingi Awa
ingi jarakánin. Ñanraagofonjo nip
gadankane. Inini, buyikhu jafoolaño
aléerhineh. Raafuso alakáneh jamaño.
Biniironjo aguyhuneh a duniyaño.

Ñanlaamero antéekinemteekin misaalhu
umaasahu Baynunkeno mu famo. Úmár
gurethinem Ñanasira Banna. Famo, úmár
ingine umaasahu Baynunkeno nip. Kanda
ayikyik bísiba bi Baynunkeno anfoy
umaasahánin. Jamanku Birikaama andék
ankúdin burukumbanku koloño ingi
rambasa ránde k'anfak annink na
bunoohunku umaasaño. Angu, umaasaño
bapúturi Birikaama, anooh a
bunoohunkunom. Banoohi, bunoohumo ingi
umaasaño anen a koloño. Baneni, jamaño
antonj búwubhunom. Kanda umaasaño

ayéjeeniŋ, «Túyomuŋ!» Ki jamaŋo ambénn
bupadhu didiiraŋo. Angu, umaasaŋo alób
k'adankaheeniŋ. Ayéjeeniŋ, «Manini
Baynunkeno gankumandehne Kasamans nip
kanda afúrumi inini uguyhunon siy atiir.
Dufak uyikahaaraŋ umaasa.» Balóbi nim,
jamaŋo anwúbom k'aniiro maŋ na a koloŋo.
Angu, h'alóbne, hómár ayikne.

Nim jamaŋo ganyéjehne. Inini,
h'awusunane imbi Baynunkeno famo,
amímiir hotir ingi h'awusunane imbi Adama
ingi Awa a Toolhu Iden. Umaasahu Adama
ingi Awa adankaheeniŋdanka mara
anfoyfoy gúlokunom. Angu Díino ayéjeeniŋ,
«Japoño jajóndonjo awalháneh a didiiraŋo.
Inini, buyikhu jafoolaŋo aléerhineh.
Raafuso ingi banéro alakáneh
ñanraagofonjo. Inini, ñanraagofonjo

annirohuneh.» Mintor nip, jarku Adama ingi Awa. Fo Díino adankane Adama ingi Awa, mintor mees gadankane. Ininkaman, fo umaasahu Baynunkenjo adankane Baynunkenjo mi famo, Baynunkenjo nip gadankane, haani Baynunkenjo mi inini. Angu, fo Díino adankane Adama ingi Awa, mintor mees gadankane. Gúmár akanne ayikyik japoño jajóndojo. Gúmár akanne raafuso ingi banéro alahah jamaño. Gúmár akanne biniironjo ayik a duniyano.

Inini, hóge impirenøj inkaanøj honj ki Díino afúnn danko n'adankane mintor? Wówo, dimpirenøj k'ínfunnoøj danko no Díino adankane mintor. Kanda, gúlob gúsuumi ingine Díino fankánam akanne honj k'afún danko nómar imbi mintor ñanraagofonjo. Jantentenjo ho utaalibehu

Yensa m'aretuhne Pol aññaañne a Líbárfhu
Gúloku Díino:

¹³ Ingah! Añañaañ a hañaañeno
ayéj: Ugurumaaren afañánahinaane
a halihano, Díino adankahemdanka.
Inini, Ukáristo, n'afañánahinaane a
halihano adankahaadanka. Kanda na
apahunpahun mintor a danko no
Díino adankarne mintor a gubaarhu
n'ínjegumoonuñne luwañankánam.

¹⁴ Angu fo Yensa Ukáristo akanne
nim, hómár adootne mi guyroñuñne
Ñanyahud duwaño no Díino
ajíkirindne Ibrahiima ingi
dimbayankánam. Nim ungu,
mintoron nip, Ñanyahudo ingi mi
guyroñuñne Ñanyahud, impirenon
k'injahoonuñ Jamméejhu Díino

Jarenninno. Agida maŋ nim Díino
ajíkirindne mintor. Te hómár
ayikhineh a gubaarhu gufiyumo
g'infiyumonne Yensa. (Gal.3v13)

Angu, danko no Díino adankane
ñanraagofonjo ingine biniironjo, biniironjo bi
bandór, símbennayo ingi Díino bandór
jahánama. Hómár ingine danko no Díino
adankane ñanraagofonjo. Angu Yensa,
f'aniirone a halihano, adoodooh danko
nómár buruhu mintor. Danko ingine
biniironjo. Angu Yensa aniironiiro buruhu
mintor. F'aniirone a halihano, Díino
adankahemdanka buruhu mintor.
Aniironiiro buruhu mintor ki danko afúr a
binentor. Líbárhú Gúloku Díino ayéji,
«Inini, Ukáristo, n'afaanánahinaane a
halihano adankahaadanka. Kanda na

apahunpahun mintor a danko no Díino
adankarne mintor a gubaarhu
n'ínjegumoonuŋne luwaŋankánam.»

Inini, aji ufiyumi Yensa, danko no Díino
adankane ñanraagofonjo afúrhuneh imbi fi.
Upakáneh a danko no Díino adankarne
mintor a gubaarhu n'ínjegumoonuŋne
luwaŋankánam. Uyikhineh kanjébo ka
bandór ki haman arinken aniiro, háteken
ajébhineh bandór arijanna imbi Díino. Faka,
ayikhineh bísiba, Díino anékuno arino
awunkulo k'újeb bandór ingi arinken
awunkulo k'uguy imbi Díino bandór
arijanna.

Faka, aji ufiyumi Yensa, Díino aduwakuno
manini a duniyaŋo. Uyikhineh kanjébo
k'afúruntne imbi Díino. Jamméejhu Díino

aguyhunek a binankan. Uyikhineh sembehu
Díino a hafithen k'upiren ukaan
h'asúumhánehne Díino. Uguyhunek a
bádinku Díino. Díino faño aguyhunek
bááhán k'aduwaro dáde.

Angu hójondoño apuñpuñ jup bájegenenku
mintor ingi Díino. Ñanraagofonjo
ambénnaybennay ingi Díino. Díino afak
adanka ñanraagofonjo. Kanda Yensa,
f'aniirone a halihano, Yensa ajóoninne ho
hójondoño apuñne. Inini, aji ufiyumi Yensa
baman a hafithen, Yensa ajóoninkineh
bájegenenku fi ingi Díino k'uguy a bádinku
Díino. Afúnnhunek danko no Díino
adankane ñanraagofonjo k'uyik kanjébo ka
bandór.